

- Et simul in dictis hastam transmisit. at illa
 Per laevum latus umbonis transivit, et ecce
 675 Palmam, qua Camelo mucronem educere coepit,
 Confixit femori, transpungens terga cavalli.
 Nec mora; dum vulnus sensit sonipes, furit atque
 Executiens dorsum sessorem sternere temptat,
 Et forsitan faceret, ni lancea fixa teneret.
- 680 Interea parvam Camelo dimisit et hastam
 Complexus laeva satagit divellere dextra.
 Quod dum perspiciens currit celeberrimus heros,
 Et pede compresso capulotenus ingerit ensem,
 Quem simul educens hastam de vulnere traxit.
- 665 Tunc equus et dominus hora decidere sub una.
 At dum forte nepos conspicerat hoc Camalonis,
 Filius ipsius, Kimo cognomine, fratris,
 Quem referunt quidam Scaramundum nomine dictum;
 Ingemit et lacrimis compellat tristior omnes
- 690 Haec me p[re]ae cunctis heu respicit actio rerum.
 Nunc aut commoriar vel carum ulciscar amicum?
 Namque angusta loci solum concurrere soli
 Cogebant, nec quisquam allii succurrere quivit.
 Advolat infelix Scaramundus jam moriturus,
- 693 Bina manu lato crispans hastilia ferro.
 Qui dum Waltharium nullo terrore videret
 Permotum fixumque loco consistere in ipso,
 Sic ait infrendens et equinam vertice caudam
 Concutiens 'in quo fidis? vel quid tua spes est?
- 700 Non ego jam gazam vel rerum quidque tuarum
 Appeto, sed vitam cognati quaero perempti.'
 Ille dehinc 'si convincar, quod proelia primus

682 cucurit A. 683 comprehenso B. 686 et B. 689 compellit B. 690 hic C. 693 olli C. 699 quae B. E. 700 nec rerum B.